

In duo per questa primavera

Il Club da ballapei Trun/Rabius ha anflau ina soluziun pil post da trenader per sia squadra da 3. ligia. Per questa primavera sorprendan Roland Decurtins e Clau Berther la responsabladad. Igl atun duei in niev trenader surpender l'equipa.

Hans Huonder/FMR

«Nus essan leds da haver anflau quella soluziun», di *Otto Beer*, il president dil club. Ton *Roland Decurtins* sco *Clau Berther* ein stai engaschai activamein duront biars onns sco giugadurs da Trun/Rabius. Tenor *Otto Beer* eis ei medemamein reussiu d'anflar ina successiun pil post da trenader naven dalla stad. Per differents motivs sappien ins aunc buca comunicar il num dil trenader niev. «Ussa eis ei denton impurtont da haver ina buna soluziun per la primavera. *Roland Decurtins* e *Clau Berther* han gia entschiet culs trenaments e vegnan a preparar l'equipa aschia ch'ella ei semtgada per las sfidas dalla primavera e lu era gia per la stagiun vegnenta», di *Otto Beer*.

La Quotidiana

mardis, ils 17 da schaner 2023

In plaz el miez dalla tabella

Sco quei che *Roland Decurtins* ha detg sin damonda dalla FMR, seigi el vegnius animaus da plirs giugadurs da surpender il post: «En sesez havevel jeu giu empermess da preparar l'equipa sil campinadi. Mo damai ch'igl ei lu buca reussiu d'anflar in trenader, sun jeu sedeclaraus prompts da surpender la responsabladad per la primavera.» *Roland Decurtins* ha trenau pli baul l'equipa sco trenader-giugadur e pli tard era sco trenader gidonter. El ei era staus engaschus sco trenader da juniors el club ed en teams dalla Surselva. Dall'equipa ha el ina bun'impressiun: «Igl engaschament els emprems trenaments ei staus fetg buns.» La finamira seigi da contonscher in plaz amiez la tabella la primavera. Ils 19 giugadurs ein tuts fits il mument. La squadra duei denton era vegnir preparada bein per la surdada al trenader niev la stad. Denter la fin dil campinadi e l'entschatta dil niev ein mo paucas jamnas, biars han lu aunc vacanzas.

Sil novavel plaz

Ils dus trenaders d'entochen ussa, *Donat Albin* e *Philippe Vincenz*, havevan giu communicau la primavera digl onn vargau da seretrer. Suentar ch'igl ei buca reussiu d'anflar ina soluziun pil post vacant, ein els sedecidi da cuntinuar igl atun. La runda digl atun el campinadi dalla 3. ligia ha la squadra terminau sil novavel plaz da 12 equipas. Sil davos dalla tabella – Buchs – ha Trun/Rabius in avantatg dad otg puncts. Il campinadi cuntinuescha sonda, ils 25 da mars 2023 cul giug ordeifer encunter Triesenberg.

Medemamein gia igl onn vargau ha *Otto Beer* communicau sia demissiun sco president dil Club da ballapei Trun/Rabius. Era per quei post para il club d'esser sin buna via d'anflar ina

soluziun. La radunonza generala dil CB Trun/Rabius ha liug ils 17 da fevrer 2023. Otto Beer ei dapi rodund diesch onns al tgamun dil club.